

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ  
ԸՆԴՈՒՆԵՑ ՀԱՅԱՍՏԱՆՈՒՄ ԻՐ ՊԱՇՏՈՆԱՎԱՐՈՒԹՅՈՒՆՆ  
ԱՎԱՐՏՈՂ ԳԵՐՄԱՆԻԱՅԻ ԴԵՍՊԱՆԻՆ**

Հունիսի 14-ին Մայր Աթոռ Ս. Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց Հայաստանի Հանրապետությունում դիվանագիտական իր առաքելությունն ավարտած Գերմանիայի Դաշնային Հանրապետության արտակարգ և լիազոր դեսպան տիկին Հայքե Փայլին:

*«Ուրախ ենք, որ առիթն ունեցանք Ձեզ ճանաչելու և այժմ, երբ հրաժեշտի պահն է մոտեցել, մեր սրտի ամենաջերմ գնահատանքը և շնորհակալությունն ենք Ձեզ փոխանցում Հայաստանում Ձեր գործունեության համար, որ օգտակար եղավ մեր Հայրենիքին և ժողովրդին»*, - ասաց Վեհափառ Հայրապետն իր խոսքում:

Հանդիպման ավարտին Ամենայն Հայոց Կաթողիկոսն իր բարեմաղթանքներն ուղղեց դեսպանին՝ հաջողություններ ցանկանալով հետագա ծառայության մեջ:

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ  
ԸՆԴՈՒՆԵՑ ԱՄՆ ՀԱՅՈՑ ԱՐԵՎՄՏՅԱՆ ԹԵՄԻ ԿԱՄԱՎՈՐՆԵՐԻՆ**

Հունիսի 22-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց ԱՄՆ հայոց Արևմտյան թեմի SIMA (Քրիստոնեական երիտասարդական առաքելություն Հայաստան) կամավորական խմբի շուրջ 30 երիտասարդների՝ Մատթեոս սարկավազ Աշի ուղեկցությամբ:

Նորին Սրբությունը ողջունեց երիտասարդներին և իր ուրախությունը հայտնեց նրանց Մայր Հայրենիքում տեսնելու համար: Վեհափառ Հայրապետը սփյուռքահայ երիտասարդներին հորդորեց լավագույնս օգտվել Հայրենիքում գտնվելու ընձեռնած հնարավորությունից՝ սեփական արմատներին առավել հարազատորեն կապվելու համար: *«Հայաստանը Ձեզ կարող է ավելին սովորեցնել մեր Հայրենիքի մասին, քան ցանկացած որևէ դասագիրք: Այստեղ և՛ պատմությունն է մեր ժողովրդի, և՛ ներկա կյանքն է, և՛ ապագա հույսն է վաղվա օրվա»*, - ասաց Վեհափառ Հայրապետն իր խոսքում և ընդգծեց, որ միայն Հայրենիքը կարող է հաղորդել այն ոգին, որ անհրաժեշտ է ազգային դիմագծի ու հավատի պահպանման համար:

Երիտասարդական այս կառույցը կազմվել է ԱՄՆ հայոց Արևմտյան թեմի առաջնորդ Տ. Հովնան արքեպիսկոպոս Տերտերյանի ջանքերով և նախապես նպատակ ունեւ Հայրենիքում կամավոր սկզբունքով օժանդակել շինարարական-վերանորոգչական աշխատանքների: Ներկայումս SIMA-ն ընդլայնել է իր գործունեության շրջանակները, և խմբի կամավորներն իրենց մասնագիտական գիտելիքներն ի սպաս են դնում տարբեր ոլորտներում:

Խմբի անդամները շուրջ երկու ամիս կմնան Հայաստանում և իրենց մասնագիտական հմտություններով կնպաստեն հիմնականում գրասենյակային տարբեր բնույթի աշխատանքների:

### **Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ԱՄՆ ՀԱՅՈՑ ԱՐԵՎՍՏՅԱՆ ԹԵՄԻ ՈՒԽՏԱՎՈՐՆԵՐԻՆ**

Հունիսի 29-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց ԱՄՆ հայոց Արևմտյան թեմի ուխտավորներին՝ Սան Ֆրանցիսկոյի Ս. Հովհաննես Կարապետ եկեղեցու հոգևոր հովիվ Ս. Սարգիս քահանա Պետոյանի գլխավորությամբ: Ս. Սարգիս քահանա Պետոյանի նախաձեռնությամբ նման ուխտագնացությունը, լինելով թվով 9-րդը, ամենամյա բնույթ է կրում:

Նորին Սրբությունը ողջունեց ուխտավորներին և իր ուրախությունը հայտնեց՝ նրանց տեսնելու Մայր Աթոռ Սուրբ Էջմիածնում: Վեհափառ Հայրապետն իր գնահատանքը բերեց Ս. Սարգիս քահանային՝ Ս. Հովհաննես Կարապետ եկեղեցու համայնքի կայացման գործում ունեցած անգնահատելի ծառայությունների և նման ուխտագնացությունների կազմակերպման հոգեշեն նախաձեռնությունների համար: Վեհափառ Հայրապետն ընդգծեց, որ այդ գնահատանքը վերաբերում է նաև այս համայնքին, քանի որ քահանայի երջանկությունը լիարժեք է ժողովրդով, իսկ նման ժողովուրդ ունենալն էլ պայմանավորված է քահանայի աշխատանքով:

Ուխտավորները երկու շաբաթ կմնան Հայաստանում՝ ուխտի մեկնելով տարբեր սրբավայրեր:

### **Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ՂԱԶԱԽՍՏԱՆԻ ՆՈՐԱՆՇԱՆԱԿ ԴԵՍՊԱՆԻՆ**

Հուլիսի 10-ին Մայր Աթոռ Ս. Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց Հայաստանի Հանրապետությունում Ղազախստանի Հանրապետության նորանշանակ արտակարգ և լիազոր դեսպան Այիմդոս Բոզջիգիտովին:

Շնորհավորելով տիար Բոզջիգիտովին նշանակման առիթով՝ Նորին Սրբությունը դեսպանին մաղթեց արդյունավետ գործունեություն իր առաքելության մեջ: Վեհափառ Հայրապետը գոհունակությամբ հաստատեց երկու երկրների հարաբերություններում առկա առաջընթացը և վստահեցրեց, որ Հայաստանյայց Առաքելական Սուրբ Եկեղեցին շարունակելու է նպաստել երկու ժողովուրդների և երկրների միջև առկա ջերմ կապերի և համագործակցության սերտացմանը:

Ամենայն Հայոց Կաթողիկոսն անդրադարձավ նաև Ղազախստանում պարբերաբար գումարվող համաշխարհային և ավանդական կրոնների հոգևոր առաջնորդներ-